



# Ein gesellege Namiddag bi de Heimatverein

Heimatverein up't Eilandje Börkum harr sien ollste Mitglieder neugt.

**BÖRKUM**/jan - Verleden Mideweek harr de Heimatverein up't Eilandje Börkum sien ollste Mitglieder - un dej am langsten in de Verein bin - tau ein gesellege Namiddag neugt. Up Tied harr man bi de Kleinbahn anfragt för ein Fahrt mit de olderwelske Wagens un dej Bo-versten van de Firma seen futt: Dann bin ji all mitnander van uns inladen. Wi spendeiern jau de Fahrt, un Koffje un Kauke is

d'r mit bi. De alltied fründleke Petra Stanggassinger harr de Baul gaud in de Greep un de Baas van de Kleinbahn, Theo Robbers, vertelde, hau dat kommen is, dat de Börkumer Kleinbahn noch so allemachdeg moje Wagens hett. Tiss as in ein Dröm, wenn man in disse Gesellschaftswagen sitt, mit lüttje Tavelkes un Lampkes un Keulskap un Göttsteine (siehe Foto). Un in de Dam-

plok satten Börkumer Junges, dej van de Fahrdereej wall Künde hebben un de Damen un Heeren seker un moiij bedaad dör de heerleke Börkumer Natür na de Reede brocht hebben. T'was fein indeckt, de Koffje was lecker, de Kauke hett mundjet, tau protjen gaff't uk Büllten un all wassen sück eineg: Dit Beleevsel hett man neit elke Dag un dusend Dank an de Kleinbahn.

Na ein Settje gung dat weer taurügg na de Bahnhoff un daar, waar frauger de olde Güterboden stunn, wachte ein heil olde Bus up de Lü un dann gung dat dör't lang Water, dör de Diekstrate, um de Hauk dör de Reedestratre bit na de Olde Toorn. Ein lüttje Loopke, um de Knaken weer smüdeg tau maken, un in Toornhuske wachten de Wichter van de Vörstand mit ein Kluckje kold

Drinken un ein lüttje Sanddoronsöpke un de Vörsitter van de Heimatverein, Gregor Ulsamer, see van Prost.

Ein paar moje Vertellsels up Börkumer Platt un de Tied gung gau vörbi, bit de Damen un Heeren seen: Nu is't gaud west, wi mutten ankerup, up Huus an. Weest bedankt för dej feine Stünden un bit ander Mal.